

### 0.0.1 ekapuggalasuttaṃ

1. ekaṃ samayaṃ bhagavā rājagahe viharati gijjhakūṭe pabbate. tatra kho bhagavā bhikkhū āmantesi bhikkhavo'ti. bhadante'ti te bhikkhū bhagavato pac-cassosum, bhagavā etadavoca:

2. anamataggoyam bhikkhave, saṃsāro pubbā koṭi na paññāyati avijjānīvaraṇānaṃ sattānaṃ taṇhāsaṃyojanānaṃ sandhāvatam saṃsarataṃ. ekapuggalassa bhikkhave, kappam sandhāvato saṃsarato siyā evaṃ mahā aṭṭhikaṅkhalo aṭṭhipuñjo aṭṭhirāsi yathāyaṃ vepullo pabbato, sace saṃhārako assa, sambhatañca na vinasseyya. taṃ kissa hetu? anamataggoyam bhikkhave, saṃsāro. pubbā koṭi na paññāyati avijjānīvaraṇānaṃ sattānaṃ taṇhāsaṃyojanānaṃ sandhāvatam saṃsarataṃ. yāvañcidaṃ bhikkhave, alameva sabbasaṅkhāresu nibbinditum, alam virajjitum, alam vimuccitunti.

3. idamavoca bhagavā. idaṃ vatvā sugato athāparaṃ etadavoca satthā:

ekassekena kappena,  
puggalassaṭṭhisaṅcayo;  
siyā pabbatasamo rāsi,  
iti vuttam mahesinā

so kho panāyam akkhāto,  
vepullo pabbato mahā;

uttaro gijjhakūṭassa,  
magadhānaṃ giribbaje.

yato ca<sup>1</sup> ariyasaccāni,  
sammappaññāya passati:  
dukkhaṃ dukkhasamuppādaṃ,  
dukkhassa ca atikkamaṃ;  
ariyañcaṭṭhaṅgikaṃ maggaṃ,  
dukkhūpasamaḡāminaṃ.

na sattakkhattu paramaṃ,  
sandhāvitvāna puggalo;  
dukkhassantakaro hoti,  
sabbasaññojanakkhayā'ti.

---

<sup>1</sup>yato - sīmu. pts.  
pts page 186